

UNIBERTSITATEA. Elkarte euskaltzaleek esan dute egoera «kezkatzeko modukoa» dela

EHUk hartutako erabakia «normala» dela adierazi du Eusko Jaurlaritzak

Irakasle elebidunei hizkuntz eskakizuna ez egitea LOU legeak agintzen duela gogoratu du



AMAIA ZABALO

EHUko Arkitektura Eskolako ikasleak euskaraz ikasteko eskubidea aldarrikatzen.

Asier Iturriagaetxebarria | BILBO

Eusko Jaurlaritzak garrantzia kendu zion Euskal Herriko Unibertsitateko (EHUko) Gobernu Taldeak hartutako erabakiari, eta zentzu batean, «normala eta logikoa» dela adierazi du. LOU legea indarrean jartzea erabaki zuen herenegun Gobernu Taldeak, eta horren ondorioz, EHUko irakasle elebidun lekuko ez da beharrezkoa izango hizkuntz eskakizuna. «EHUk hartu duen erabakiaren oinarria Espainiako Gobernuak inposatutako LOU legean dagoela kontuan izan behar da. Azken baten, behartuta egon dira irakasleen kudeaketarako zirkularrak aldatzera, bestela legez kanpoko egoeran egongo lirarteke eta», adierazi dio EGUNKARIARI Jon Barrutia Unibertsitate eta Ikerkuntza sailburuordeak.

EHUren jarrera kritikatu beharrean, Espainiako Gobernuari eta indarrean jarri duen LOU legeri leporatu dio Barrutiak EHU gertatzen dena. «LOU legeak behartzen du EHU erabaki hori hartzera, bertan argi eta garbi esaten delako hizkuntz eskakizuna, eta kasu honetan euskara, bigarren mailan geratzen dela. Horren aurrean, nahiago du gaikuntza sistema ezarri». Bestalde, LOU legea garatzen

duen Errege Dekretua «oso murritzalea» dela gaineratu zuen, «unibertsitate bakoitzaren nortasuna eta autonomia mugatzen duelako».

LOUren berri izan zuenetik, Jaurlaritzak «gogor» kritikatu duela legea gogoratu zuen Unibertsitate eta Ikerkuntza sailburuordeak. «Legea urtarrilean ipini zuten indarrean, baina orain arte ez dugu jakin nola garatuko zen. Beraz, azken hilabeteetan izugarritzko ezjakintasunean mugitu gara bai gu —Jaurlaritza— eta bai EHU».

Egoera horri aurre egiteko eta euskarazko irakaskuntza ber-

matzeko, Jaurlaritzak kontratazio sistema bultzatuko duela esan du Barrutiak. «Baina kalitatezko irakaskuntza, bestela esango dutelako euskarazko irakasleak ez daukatela prestakuntza nahikorik eta atzeko atetik sartu direla. Kalitatea bermatuta egongo da».

Elkarte euskaltzaleek EHUk harturiko erabakia kritikatu dute

EHUren Gobernu Taldeak hartutako erabakia ez kritikatzeko erabaki du, beraz, Jaurlaritzak. Ez dute jarrera bera hartu elkarre euskaltzaleek. Xabier Mendiguren Kontseiluko idazkari na-

gusiak esan digunez, «seinale txarra» da gertatzen ari dena. «Finean, gure unibertsitateak bizi duen egoera zein den agerian uzten du. Tristeia eta kezkatzeko modukoa da EHUk egin duena. Londresko unibertsitate batean eskolak emateko ingeleseko derrigorrezko baldintza ez izatea ez luke inork ulertuko, baina hemen egoera horretan gaude». EHUk hartu behar duen bidea «guztiz alderantzizkoa» izan behar dela azpimarratu zuen, euskaraz ikasi nahi duenak bestela ere nahikoa «oztopo» topatzen dituelako unibertsitateak hiltzean. Horren harira, euskarazko unibertsitate irakaskuntza bermatu behar duena Jaurlaritza eta Euskal Unibertsitate Legea direla gaineratu zuen.

Euskal Herrian Euskarazek (EHEk) ere gogor kritikatu du EHU, eta herenegun hartu zuen erabakia «lotsagarria» dela azaldu zuen. «Unibertsitateko agintariei hartutako erabakia bertan behera uzteko eskatzen diegu, eta irakasle guztiak euskaldunak izateko beharrezko neurriak hartzea».

Hizkuntz Eskubideen Behatoki zuzendari Paula Casares ere haserre agertu zen EHUren erabakiarekin, eta «atzerapausoa» dela nabarmendu zuen.

EPAIKETA

Ados dira laguna hil zuen ertzaina psikiatrikoan sartzeko

Erredakzioa | BILBO

Neska-lagun ohia hiltzeagatik Bizkaiko Probintzia Auzitegian epaitu behar zuten ertzaina 17 urtez psikiatrikoan internatuko dute eta 120.000 euroko kalte-ordaina ordaindu beharko die Idoia Gil neska senideei. Horrela hitzartu zuten atzo, akusazio partikularrak eta herri akusazioa daraman Clara Campoamor elkarrekin Fiskaltzarekin.

Ezarritako 120.000 euroko kalte-ordainetik 30.050 euro datozen egunetan ordaindu beharko ditu akusatuak. Gainerakoa, ertzainak Eusko Jaurlaritzatik jasotzen duen ezintasun-pentsiotik kenduko zaio.

Hilketa 1998ko abenduan gertatu zen, Bilboko San Inazio auzoan. J.L.G.M. ertzaina «gaixo-agiria» hartua zegoen zituenez arazo psikologikoenagatik; neska-lagun oihari deitu eta bere etxera joateko eskatu zion. Idoia Gil bertaratu zenean, ertzainak labankadaz hil zuen. Berak deitu zuen ertzain etxera, gertatu zenaren berri emateko.

Herenegun hasi zen epaiketa. Clara Campoamor elkarrekin 25 urteko espetxe zigorra eskatu zuen ertzainarentzat, Fiskaltzak 12 urteko zigorra eskatu zuen, eta ertzainaren defentsak kartzela zigorraren orde, tratamendu psikiatrikoa ezartzeko eskatu zuen. Izan ere, ertzainak «arazo psikologikoak» zituela argudiatu zuen.

Hilketa izan zela onartu dute

Akusazioaren abokatu Elsa Imatz Basarratek azaldu zuenaren arabera, atzo bi aldeek lortutako akordioan «gertatutakoa Zigor Kodearen 139.3 artikuluan jasotzen den hilketa» izan zela onartu zuten.

Baina hiltzaileak dituen arazo psikologikoak kontuan hartuta, «duen buruko gaixotasuna sendatzeko egokia den zentro berezi batean egon dadin hitzartu dugu. Kartzela sistemak ez baitu bergizarteratzen».

EUSKAL UNIBERTSITATE LEGEA

20 egunetan prest izango du Jaurlaritzak legearen zirriborroa

Euskal Unibertsitate Legea prestatzen ari dira azken hilabeteetan Hezkuntza Saileko langileak. Horretarako, unibertsitatearekin zerikusia daukaten eragileekin bildu dira, euren iritzia eta proposamenak biltzeko. Jon Barrutiak atzo EGUNKARIARI aurreratu zionez, lan horiek «oso aurreratuta» dituzte. «Euskal Unibertsitate Legearen zirriborroa laster egongo da gertu. Nik uste dut 20 egun barru izango dugula. Kasurik txarrenean, azarorako egongo da», azaldu du Unibertsitate eta Ikerkuntza sailburuordeak. Hurrengo pausoa zirriborroa Eusko Legebiltzarrean eztabaidatzea izango da.